

放翁題跋



放翁題跋

目錄

卷之一

真廟賜馮侍中詩

高宗聖政草

高宗賜趙延康御書

高皇御書二則

今上皇帝賜包道成御書崇道庵額



跋尹耘師書劉隨州集

跋唐御覽詩

跋文武兩朝獻替記

跋杲禪師蒙泉銘

跋修心鑑

跋邵公濟詩

跋坐忘論

跋查元章書

跋高象先金丹訣二則

跋天隱子

跋造化權輿

跋老子道德古文

跋卮菴語

跋武威先生語錄

跋關著作行記

跋司馬子微餌松菊法

跋周茂叔通書

跋岑嘉州詩集

跋二賢像

跋山谷先生三榮集

跋硯錄香法

跋唐修撰手簡

跋蔡君謨帖

跋瘞鶴銘

跋西崑酬唱集

跋歷代陵名

跋溫庭筠詩集

跋王君儀待制易說

跋崔正言所書書法要訣

跋後山居士詩話

跋佛智與升老書

跋古柏圖

卷之二

跋中和院東坡帖

跋漢隸

跋晁百谷字敘

跋陵陽先生詩草

跋荆公詩

跋續集驗方

先左丞使遼語錄

跋朝制要覽

跋東坡問疾帖

跋東坡詩草

跋孫府君墓誌銘

跋蘇魏公百韻詩

跋家藏造化權輿二則

跋三蘇遺文

跋兼山先生易說二則

跋鄭虞任昭君曲

跋傅正議至樂菴記

跋中興間氣集二則

跋齊驅集

跋柳柳州集二則

跋說苑

跋章氏辨誣錄

跋釣臺江公奏議

先太傅遺像

跋高康王墓誌

跋半山集

跋李淡之論事集

跋李莊簡公家書

跋之罟先生橐

跋吳夢予詩編

跋松陵集三則

跋王仲言乞米詩

跋金奩集

跋韓非子

跋却掃編

跋彩選四則

跋陝西印章二則

跋詩橐

跋祕閣讀帖張長史率意帖

跋王深甫先生書簡

跋郭德誼墓誌銘二則

跋郭德誼書

卷之三

跋後山居士長短句

跋蘇氏易傳

跋資暇集

跋法帖二則

跋蘭亭樂毅論并趙歧王帖

跋蔡肩吾所作蘧府君墓誌銘

跋原隸

跋京本家語二則

跋李徂徠集

跋劉文老使君義居遺戒

跋無逸講義

跋東坡帖

跋東坡祭陳令舉文

跋劉凝之陳令舉騎牛圖

跋東坡七夕詞後

跋張監丞雲莊詩集

跋淵明集

跋陸史君廟籤

跋巴東集

跋呂侍講歲時雜記

跋許用晦丁卯集

跋李涪刊誤

跋歸去來白蓮社圖

跋釋氏通紀

跋毛仲益所藏蘭亭

跋魏先生草堂集

跋王輔嗣老子

跋前漢通用古字韻編

跋胡少汲小集

跋曉師顯應錄

跋范巨山家訓

跋張安國家問

跋坐忘論

跋唐盧肇集

跋居家雜儀

跋皇甫先生文集

跋南堂語

跋注心賦

跋朱新仲舍人自作墓誌

跋黃魯直書

卷之四

跋蘭亭序

跋李少卿帖

跋樂毅論

跋李朝議帖

跋東方朔画贊

跋李虞部與范忠宣公啟

跋范文正公書

跋東坡帖

跋盧秉父絕句

跋四三叔父文集

跋王右丞集

跋歐陽文忠公疏草

跋盤澗圖

跋爲瑛師書維摩經

跋東坡諫疏草

跋東坡代張文定上疏草

跋楊處士村居感興

跋朱氏易傳

跋晁以道書傳

跋嵩山景迂集

跋任德翁梁桴集

跋洪慶善帖

跋蒲郎中易老解

跋陸子彊家書

跋子聿所藏國史補

跋火井碑

跋韓晉公牛

跋画橙

跋臨帖

跋米老画

跋潘鹵老帖

跋薌林帖

跋陳魯公所草親征詔

跋蔡忠懷送將歸賦

跋東坡書髓

跋范元卿舍人書陳公實長短句後

跋謝師厚書

跋雲丘詩集後

跋呂舍人九經堂詩

跋韓忠獻帖

跋高大卿家書

卷之五

跋諸晁書帖

跋南城吳氏社倉書樓詩文後

跋六一居士集古錄跋尾

跋林和靖詩集

跋米元暉書先左丞海岱樓詩

跋蘇丞相手澤

跋韓幹馬

跋義松

跋林和靖帖

跋東坡集

跋陶靖節文集

跋三近齋餘錄

跋望江麴君集

跋吳越備使二則

跋僧帖

跋卿師帖

跋松陵倡和集

跋潛虛

跋呂成未和東坡尖義韻雪詩

跋花間集二則

跋韓晉公子母犢

跋韓立道所藏蘭亭序

跋龔氏金花帖子

跋曾文清公奏議稿

跋曾文清公詩稿

跋魚計賦

跋徐待制詩稿

跋周益公詩卷

跋樊川集

跋周侍郎奏稿

跋周侍郎尋姊妹帖

跋鮑參軍文集

跋南華真經

跋與周監丞書

再跋皇甫先生文集後

跋漢文帝後元年三月詔

跋張魏公與劉察院帖

跋世父大夫詩稿

卷之六

跋魯直書大戴踐阼篇

跋唐昭宗賜錢武肅王鐵券文

跋司馬端衡画傳燈圖

跋呂伯英書後

跋張敬夫書後

跋劉戒之東歸詩

跋秦淮海書

跋柳書蘇夫人墓誌

跋朱希真所書雜鈔

跋爲子適書詩卷後

跋呂文靖門銘

跋傅給事竹友詩稿

跋陳伯予所藏樂毅論

跋伯予所藏黃州兄帖

跋詹仲信所藏詩稿

跋陳伯予所藏蘭亭帖

跋坡谷帖

跋山谷書陰真君詩

跋呂尚書帖

跋傅給事帖

跋熊舍人四六後

跋臨汝志

跋尼光語錄

跋程正伯所藏山谷帖

跋張待制家傳

跋柳氏訓序

跋祠部集

跋消災頌

跋肇論

跋先楚公奏檢

跋宗元先生文集

跋韓子蒼語錄

跋孟浩然詩集三則

跋出疆行程

跋李衛公集

跋徐節孝語

跋趙渭南詩集

跋石鼓文辨

跋西崑酬唱集

跋兼山家學

跋淮海後集

跋張季長中庸辨擇

跋法書後

跋李太白詩

跋重廣字說

跋巖壑小集

跋王元澤論語孟子解

放翁題跋目錄

終

放翁題跋卷之一

宋 山陰陸游

撰

明 古虞毛晉

訂

真廟賜馮侍中詩

某家舊藏孝嚴殿繪像先正侍中馮公在焉冠劍
偉然與大行黃河氣象相埒每稽首歎曰侍中輔
相兩朝更天下大變而社稷奠安夷狄讐服鉏耨
萬里無犬吠之警有以也夫晚待罪新定公之孫

放翁是跋
一
頤出示章聖皇帝賜詩又以想見一時盛事恨不生其時俯伏沙隄旁窺望風采云

高宗聖政草

某被命修光堯皇帝聖政草勅凡例網羅放逸雖寢食間未嘗置也然不敢以稿畱私篋暇日偶追記得此命兒輩錄之隆興二年六月一日左通直郎通判鎮江軍府事陸某記

高宗賜趙延康御書

右知金壇縣趙君師懇錄高宗賜其大父延康公書及延康移僞楚書共爲一編以示史官陸某某曰延康在宣和靖康間聲望風采震耀一時及守宛丘百戰禦在虜卒全其城視唐代張巡許遠顏真卿皆過之來朝行在高皇蓋欲以左轄命之議者謂宗室輔政非故事遂止方公之宰徒也謝表有云臣本支百世侍從三朝又云堅壁以保近畿慨前功之俱廢登壇而陪盛禮懷曩遇以自憐讀

者悲之某又嘗於公從孫師嚴有翼家見公建炎
奏議稿一編皆人所至難言者不知此稿皆在鑑
堂集中否或可訪於有翼院中以補逸遺敢併以
告嘉泰癸亥歲三月丙申臣某謹識

高皇御書二

臣某少時與胡尚書之子杞同學於雲門山中見
高皇帝賜尚書御題扇曰文物多師古朝廷半老
儒蓋黃體也與此手詔絕相類後數年蒙收召得

面天顏距今四十四年矣伏讀霄涕不知所云嘉
泰癸亥五月一日史官臣陸某謹題

又

臣某伏覩高皇帝御天下幾二十年進用諫官御
史皆出聖選故往往躡至相輔其不合者猶爲侍
從乃去如施公財任遺補卽出守小郡蓋無幾人
則其犯顏拂指不撓於權倖可以想見而上之知
人受盡言有仁祖用范仲淹唐介之風矣惜乎施

公遽逝去不及召用於虜悲夫開禧乙丑九月一日故史官陸某謹書

今上皇帝賜包道成御書崇道菴額

開禧某年某月甲子皇帝親御翰墨書崇道菴三字賜鈔行先生臣包道成以示故史官臣陸某將刻之石具載歲月及被賜之由示天下後世臣某竊聞臣道成實晉陵人少學黃老之說以劬身濟衆爲事寓跡都城三十餘年築堂以居凡以黃冠

褐衣至者靡不館之往來千人蓋嘗有神僊異人混於衆中道成獨默識之而不言會稽光孝觀故名乾明天聖間章獻明肅皇后遣中使築之久壞不葺道成談笑復其舊凡都城橋梁道路皆力治之費至緡錢百餘萬建東嶽廟吳山上既成又卽其傍築室以奉真武左江右湖氣象雄麗而道院屹立於廡外鐘磬步虛之聲在雲霄間都人爲之心駭神竦於是皇帝聞而異之故有扁榜之賜臣

放翁是跋 四
某犬馬之年駸駸九十獲在聖主仁壽域中且嘗
獲紬繹三朝金匱石室之藏今雖篤老猶幸未病
廢得以紀稀濶盛事豈非幸哉開禧二年歲在丙
寅三月某日太中大夫充寶謨閣待制致仕山陰
縣開國子食邑五百戶賜紫金魚袋臣陸某昧死
稽首再拜謹書

跋尹耘師書劉隨州集

傭書人韓文持束紙支頭而睡偶取視之劉隨州

集也乃以百錢易之手加裝褫紹興二十五年正
月八日陸某記

尹耘師耕鄉里前輩與九伯父及先君游此集蓋
其手抄云紹熙元年七月望某再跋

跋唐御覽詩

右唐御覽詩一卷凡三十人二百八十九首元和
學士令狐楚所集也按盧綸墓碑云元和中章武
皇帝命侍臣采詩第名家得三百一十篇公之章

放翁是跋 五
句奏御者居十之一今御覽所載綸詩正三十二
篇所謂居十之一者也據此則御覽爲唐舊書不
疑然碑云三百一十篇而此纔二百八十九首蓋
散逸多矣姑按定訛謬以俟完本御覽一名唐新
詩一名選集一名元和御覽云紹興乙亥十一月
八日吳郡陸某記

跋文武兩朝獻替記

學者當以經綸天下自期此書不可不見也但傳

本謬誤幾不容讀以它書尋繹之十得四五云紹
興丙子臘日務觀題

跋杲禪師蒙泉銘

右妙喜禪師爲良上人所作蒙泉銘一首往予嘗
晨過鄭禹功博士坐有僧焉予年少氣豪直據上
坐時方大雪寒甚因從禹功索酒連引徑醉禹功
指僧語予曰此妙喜也予亦不辭謝方說詩論兵
旁若無人妙喜遂去其後數年予老於憂患志氣

摧落念咎之在痛自悔責然猶冀一見作禮懺悔
孰知此老遂棄世而去邪雖然良公益一世明眼
衲子不知予當時是卽今是試爲下一轉語隆興
改元十一月五日笠澤漁隱陸某書

跋修心鑑

右高祖太傅公修心鑑一篇初公生七年家貧未
就學忽自作詩有神僊語觀者驚焉晚自號朝隱
子嘗退朝見異人行空中足去地三尺許邀與俱

歸則古僊人嵩山栖真施先生肩吾也因受鍊丹
辟穀之術尸解而去然其術祕不傳今惟此書尚
存某旣刻版傳世并以七歲吟及自贊附卷末庶
幾篤志方外之士讀之有所發焉亦公之遺意也
隆興二年七月二日元孫某謹書

跋邵公濟詩

先子入蜀時與邵子文遇於長安同遊興慶池有
詩倡酬相得驩甚夜讀公濟詩超然高逸恨未嘗

得講世舊與文盟也乾道元年五月十八日笠澤
漁隱陸某書

跋坐忘論

司馬子微師體玄先生潘師正體玄師昇玄先生
王遠知昇玄師貞白先生華陽隱居陶弘景故體
玄語子微曰吾得陶隱居正一法逮汝四世矣乾
道二年天慶節借玉隆藏室本傳漁隱子手記

跋查元章書

李份事士大夫謹以故得書帖多不可數然閱其
書至不敢與他札偕藏者元章吏部一人而已份
一吏耳知敬元章如此豈知元章仕於朝既不
容去而居幙府又不容自引於數千里外赤甲白鹽
之間乃少安嗚呼亦可歎也夫丙戌上元後三日
漁隱書

跋高象先金丹訣

右玉隆萬壽觀本序言有注解而不傳亦不知序

者爲何人也丙戌二月八日務觀書

又

國初有高象先淳化中爲三司戶部副使少從戚
同文學與宗度許驥陳象輿郭成範王礪膝涉齊
名不言其所終亦不知其鄉里恐卽此人然序言
名先字象先又似別一人神仙隱顯不可必知聊
記之耳辛亥炊熟日書

跋天隱子

最後易簡漸門二說非天隱子本語他日錄本當
去之丙戌三月中休傳本於玉隆萬壽宮漁隱
東坡先生以爲天隱子真司馬子微所著也傳本
後二十五年紹熙庚戌冬至日書

跋造化權輿

先楚公著埤雅多引是書然未之見也乾道三年
孟夏十八日傳自玉隆藏室甫里陸某謹題

跋老子道德古文

右漢嚴君平著道德經指歸古文此經自唐開元以來獨傳明皇帝所解故諸家盡廢今世惟此本及貞觀中太史令傅奕所校者尚傳而學者亦罕見也予求之踰二十年乃盡得之玉笈藏道書二千卷以此爲首漁隱陸某題乾道二年十月十日

跋卮菴語

乾道庚寅十月入蜀舟過公安二聖見祖珠長老得此書珠自言南平軍人得法於卮菴云

跋武成先生語錄

豐清敏公爲中執法論事上前曰司馬光呂公著皆忠賢何爲引赦復官赦當及有罪耳無罪何赦也徽祖曰光等變先帝法度非罪乎清敏公頓首曰誠當變無可罪者方元符建中間衆正畢集於朝天下喁喁想望太平清敏公與陳忠肅公俱極諫官御史之選而所以言則有婉直之異吾先大夫楚公每以爲二公之論皆不可廢蓋忠肅似孟

子說齊而清敏似伯夷諫周其歸一也今觀武威
先生之論又甚似清敏百世之下志士仁人得此
書讀之當有太息流涕者矣乾道七年立秋日山
陰陸某書

跋關著作行記

著作關公出使峽中風采峻甚仕者人人震慄莫
敢仰視某以孤生起臯籍萬里佐州淺闇滯拙自
期且汰去而關公獨厚遇之舉酒賦詩談臺閣舊

事忘其位之重也公免歸之明年某以事至臥龍
山咸平寺長老惠璉言公往有行記今將刻之石
因屬某書其末某曰方關公之門可炙手時此書
伏不出今公歸臥青城山中賓客解散形勢一變
而璉方刻其書爲不朽計嗟乎足以愧士大夫矣
乾道七年七月七日左奉議郎通判夔州軍州主
管學事陸某謹識

跋司馬子微餌松菊法

乾道初予見異人於豫章西山得司馬子微餌松
菊法文字古奧非妄庸所能附託八年又得別本
於蜀青城山之丈人觀齋戒手授傳之同志十二
月六日笠澤漁翁陸務觀書於玉華樓

跋周茂叔通書

濂谿之生也世但以佳士許之耳既死蒲左轄作
誌黃太史作詩其稱述亦不過如此向使無二程
先生後世豈知濂谿爲大儒傳聖人之道者邪以
此知士之埋沒無聞者何可勝計乾道壬辰十二
月十五日成都驛南窗書

跋岑嘉州詩集

予自少時絕好岑嘉州詩往在山中每醉歸倚胡
床睡輒令兒曹誦之至酒醒或睡熟乃已嘗以爲
太白子美之後一人而已今年自唐安別駕來攝
犍爲旣画公像齋壁又雜取世所傳公遺詩八十
餘篇刻之以傳知詩律者不獨備此邦故事亦平

生素意也乾道癸巳八月三日山陰陸某務觀題

跋二賢像

右孟貞曜歐陽率更二像皆唐人筆墨北湖者吳則禮子傳也無悔者劉燾無言也最後實先君會稽公茶山先生曾文清公書萬里羈旅不自意全撫卷流涕乾道九年九月既望刻石置漢嘉月榭上山陰陸某識

跋山谷先生三榮集

予集黃帖得贈元師及王周彥三詩甚愛之有黃淑者家三榮見而笑曰紹興中再刻本也舊石方黨禁時已磨毀矣乃出此卷曰是舊石本其筆力精勁益如此因錄藏之淳熙之元二月二日務觀書

跋硯錄香法

硯錄舊有本而亡之香法蓋未之見師房者濟南衛昂也娶婆娑先生崔德符女晚官巴硤歿焉乾

道辛卯冬予得此編於巫山縣師房手鈔也已腐
敗不可讀乃錄藏之後三年淳熙之元二月三十
日蜀州漱玉南窗務觀書

跋唐修撰手簡

某之曾外大父質肅唐公守并州故給事中呂公
實爲幙客質肅爲人方嚴少許可或面折人臨川
王和甫同時在幙中每言見唐公退輒汗滿握然
遇呂公特歡他客莫敢望也淳熙元年某在蜀州

得質肅仲子修撰公與給事手帖讀之蓋元祐初
修撰使河北給事爲御史時也書論黃河市易辭
指激烈無一語及其私與世俗責報父客至有違
言者何其遠哉修撰字君益元祐中建議棄渠陽
城紹聖初坐貶團練副使元符建中之間起守許
昌方治事得報召蔡京撫案憤咤卽日疽發背卒
某不及拜公而先夫人爲言公大節如此敢併記
之以遺給事之孫教授君云七月二十三日山陰

陸某謹書

跋蔡君謨帖

近歲蘇黃米芾書盛行前輩如李西臺宋宣獻蔡君謨蘇才翁兄弟書皆廢此兩軸君謨真行草隸皆備石在仙井可寶也淳熙元年九月八日蜀州手裝

跋瘞鶴銘

瘞鶴銘予親至焦山摹之止有此耳殘璋斷珞當

以真爲貴豈在多邪淳熙之元九月一日蜀州重裝

跋西峴酬唱集

通直郎張玠河陽人呂汲公家外甥藏書甚富淳熙二年正月八日夜讀此集燈架忽仆壞書時傳畢方一日豈歐尹諸人亦有靈邪記之爲異時一笑

跋歷代陵名

三榮守送來近世士大夫所至喜刻書版而略不
按讎錯本書散滿天下更誤學者不如不刻之愈
也可以一歎淳熙乙未立冬可齋書

跋溫庭筠詩集

先君舊藏此集以華清宮詩冠篇首其中有早行
詩所謂雞聲茅店月人跡板橋霜者久已墜失得
此集於蜀中則不復見早行詩矣感歎不能自己
淳熙丙申重陽日某識

跋王君儀待制易說

王公易學雖出於孫光張先生然得於心者多矣
建炎間胡騎在錢塘明越俱陷王公端居於嚴曰
虜決不至此且狼狽而歸自此窮天地不復渡江
矣其妙於易數蓋如此淳熙丁酉元日山陰陸某
書於錦官閣下

跋崔正言所書書法要訣

德符詩名一代書則未之見也觀此編中字瘦健

有神采亦類其詩乃知前輩未易以一技名也戊戌重午務觀書

跋後山居士詩話

談叢詩話皆可疑談叢尚恐少時所作詩話決非也意者後山嘗有詩話而亡之妄人竊其名爲此書耳後山二子豐登登過江爲會稽曹官李鄴降虜登亦被驅以北悲夫淳熙戊戌十月二十四日可齋

跋佛智與升老書

此一編佛智禪師與其法子寒巖升公書也議論超卓殆非世儒所及三復歎仰淳熙己亥三月九日建安雙清堂書

跋古柏圖

此圖吾家舊藏予居成都七年屢至漢昭烈惠陵此柏在陵旁廟中忠武侯室之南所謂先主武侯同闕宮者與此略無小異則画工亦當時名手也

淳熙六年龍集己亥六月一日陸某識

放翁題跋卷之二

跋中和院東坡帖

此一卷皆蘇仲虎尚書所藏鑒定精審無一帖可疑者刻石在成都大聖慈寺中和勝相院淳熙六年六月十七日陸務觀題

跋漢隸

漢隸十四卷皆中原及吳蜀真刻淳熙己亥集於建安公署友人莆陽方士繇伯暮親視裝標故無

一字差謬者六月二十一日山陰陸某書

跋晁百谷字叙

名者士所願也而或懼太早何哉吾測之審矣少而得名我不能不矜人不能不忌以滿假之心來讒慝之口幾何其不躓也吾元歸年甫二十筆力扛鼎不患無名患太早耳雖然洪道方力張其名而吾獨欲其退避揜覆元歸未必樂也與時出入朝廷更歷世故會當思吾言也夫淳熙庚子二月

三日山陰陸某書

跋陵陽先生詩草

右陵陽先生韓子蒼詩草一卷得之其孫籍先生詩擅天下然反覆塗乙又歷疏語所從來其嚴如此可以爲後輩法矣予聞先生詩成旣以予人久或累月遠或千里復追取更定無毫髮恨迺止則此草亦未必皆定本也大歇菴詩一章徐師川作而先生手錄之亦足見其無咎人爭名之病矣故

附見卷中淳熙庚子四月二十二日笠澤陸某書

跋荆公詩

右荆公手書詩一卷前六首贈黃慶基後七首贈鄧鑄石刻皆在臨川淳熙七年七月十七日陸某謹題

跋續集驗方

予家自唐丞相宣公在忠州時著陸氏集驗方故家世喜方書予宦遊四方所獲亦以百計擇其尤

可傳者號陸氏續集驗方刻之江西倉司民爲心齋淳熙庚子十一月望日吳郡陸某謹書

先左丞使遼語錄

右先楚公使遼錄一卷三十八伯父手書伯父自幼被疾以左手書然筆力清健如此平生凡鈔書至數十百卷云淳熙八年四月五日某謹識

跋朝制要覽

先君會稽公晚歲喜觀此書間爲子弟講論因草

率至夜分先君捐館舍三十有四年統得此於故
廬伏讀悲哽敬識卷末淳熙八年龍集辛丑十一
月二十五日山陰陸某書

跋東坡問疾帖

東坡先生憂其親黨之疾委曲詳盡如此則愛君
憂國之際可知矣其曰勿使常醫弄疾天下之至
言讀之使人感歎彌日淳熙九年五月乙未甫里
陸某書

跋東坡詩草

東坡此詩云清吟雜夢寐得句旋已忘固已奇矣
晚謫惠州復出一聯云春江有佳句我醉墮渺莽
則又加於少作一等近世詩人老而益嚴蓋未有
如東坡者也學者或以易心讀之何哉淳熙九年
五月二十六日玉局祠吏陸某書於鏡湖下鷗亭

跋孫府君墓誌銘

方五代割裂時自一郡以上非其國子弟則大將

功臣也士大夫仕爲令掾者已爲達官錢氏土境
尤蹙而孫公至專城蓋其國顯人也觀杜公所述
亦誠有以得之矣淳熙壬寅立秋日甫里陸某

跋蘇魏公百韻詩

右首一卷丞相魏公謝事歸第且八十時所作也
蘇端明賀趙清獻公得謝啓云念平生之百爲一
無可恨某於魏公亦云淳熙壬寅立秋日吳郡陸
某謹識

跋家藏造化權輿

右造化權輿六卷楚公舊藏有九伯父大觀中題
字淳熙壬寅得之故第廢紙中用別本讎校而闕
其不可知者兩本俱通者亦具疏其下六月四日
山陰陸某謹記

後十有四年慶元元年八月十二日重校凡三日
而畢時年七十一

跋三蘇遺文

此書蜀郡呂商隱周輔所編周輔入朝爲史官得唐安守以歸未至家暴卒良可悲也淳熙十一年正月十一日務觀識

跋兼山先生易說

郭立之從程先生遊最久程先生病革猶與立之有問會語著於語錄而尹彥明獨謂立之自黨論起卽與程先生絕死亦不弔祭蓋愛憎之論也立之子雍字子和屏居峽中屢聘不起亦著易說得其家學蓋程氏易學立之父子實傳之淳熙甲辰二月三十日甫里陸務觀云

後六年得謝昌國所贈頤正先生辨尹公說乃知予此言麤合也頤正卽雍也已酉八月二十八日某書

跋鄭虞任昭君曲

自張文潛下世樂府幾絕吾友鄭虞任作昭君曲如羊車春草空芊芊及重瞳光射搔頭偏之類文

此書蜀郡呂商隱周輔所編周輔入朝爲史官得
唐安守以歸未至家暴卒良可悲也淳熙十一年
正月十一日務觀識

跋兼山先生易說

郭立之從程先生遊最久程先生病革猶與立之
有問會語著於語錄而尹彥明獨謂立之自黨論
起卽與程先生絕死亦不弔祭蓋愛憎之論也立
之子雍字子和屏居峽中屢聘不起亦著易說得
其家學蓋程氏易學立之父子實傳之淳熙甲辰
二月三十日甫里陸務觀云

後六年得謝昌國所贈頤正先生辨尹公說乃知
予此言麤合也頤正卽雍也已酉八月二十八日
某書

跋鄭虞任昭君曲

自張文潛下世樂府幾絕吾友鄭虞任作昭君曲
如羊車春草空芊芊及重瞳光射搔頭偏之類文

方翁是跋 六
潛殆不死也但願夕烽長不驚甘泉妾身勝在君
王前能道昭君意中事者淳熙甲辰三月二十三
日甫里陸某書

跋傅正議至樂菴記

伏波將軍困於壺頭曳病足土室中以望夷賊左
右哀之莫不爲流涕定遠侯在西城三十年年老
思土上書自言願生入玉門關詞指甚哀彼封侯
富貴矣然戚戚無聊乃如此其他盈滿脆脆畏禍

憂誅願爲布衣不可得者又何可勝歎然則富貴
果不如貧賤之樂邪曰此自富貴者言之耳貧賤
之士仕則無路處則無食自非有道君子其憂又
有甚者矣正議傅公在學校二十年聲震京師同
舍生去爲公卿者袂相屬而公始僅得一第旣仕
矣適時艱難妄男子往往起閭巷取美官公又棄
不用則亦何自樂哉及讀所作至樂菴記自道其
胸中恢疎磊落所以樂而忘憂者文辭辯麗動人

有列禦寇莊周之遺風然後知公益有道者或曰
使天以富貴易公之樂公其許之乎予曰公所以
處貧賤者則其所以處富貴也顏回之簞瓢周公
之衮繡一也觀斯文者盍以是求之淳熙十一年
七月十六日山陰陸某謹書

跋中興間氣集

高適字仲武此乃名仲武非適也評品多妄蓋淺
丈夫耳其書乃傳至今天下事出於幸不幸固多

如此可以一歎淳熙甲辰八月二十九日放翁書
高適字仲武此集所謂高仲武乃別一人名仲武
非適也議論凡鄙與近世宋百家詩中小序可相
甲乙唐人淡於詩者多而此等議論乃傳至今事
固有幸不幸也然所載多佳句亦不可以所託非
其人而廢之

跋齊驅集

此集刻版於宣和三年方是時黨禁猶未解文士

蓋僅有見故本多誤然好事者冒法刻之亦奇矣
淳熙甲辰重午日陸務觀書

跋柳柳州集

此一卷集外文其中多後人妄取他人之文冒柳
州之名者聊且哀類於此子京
右三十一字宋景文公手書藏其從孫景家然所
謂集外文者今往往分入卷中矣淳熙乙巳五月
十七日務觀投畢

跋說苑

李德芻云館中說苑二十卷而闕反質一卷曾鞏
乃分修文爲上下以足二十卷後高麗進一卷遂
足淳熙乙巳十月六日務觀書

跋章氏辨誣錄

徽宗皇宗盛德大度自秦漢以來人主莫能及者
尤在友愛蔡王寬貸章惇而史臣不能發明可爲
太息淳熙丙午十月望陸某謹題

跋鈞臺江公奏議

某乾道庚寅夏得此書於臨安後十有七年蒙恩
守桐廬訪其家復得三表及贈告墓志因併刻之
以致平生尊仰之意淳熙十三年十一月十有六
日笠澤陸某書

先太傅遺像

先太傅皇祐中以吏部郎中直昭文館自會稽移
守新定期年請老得分司西京以歸迄今百四十

年而某自奉祠玉局起爲是邦實繼遺躅於是知
建德縣事蘇君林以父老之請築祠宇於兜率佛
寺淳熙十四年春正月丙辰備車旗儀物大合樂
奉遺像於祠且以公自贊道帽羽服像刻之堅珉
慰邦人無窮之思朝隱子蓋公自號云元孫朝請
大夫權知嚴州軍州事陸某謹書

跋高康王墓誌

王岐公文章閎麗有西漢風而宋常山公書法森

嚴實傳鍾張古學方裕陵致孝實慈極天下養故
竝命兩公彰顯高氏先王功烈以詔萬世可以爲
寵光矣中更亂離而墨本寶藏如新殆有神物護
持云淳熙十四年二月三日笠澤陸某謹識

跋半山集

右半山集二卷皆荆公晚歸金陵後所作詩也丹
陽陳輔之嘗編纂刻本於金陵學舍今亡矣淳熙
戊申上巳日笠澤陸某書

跋李漢之論事集

唐丞相司空李公漢之論事集有兩本其一本七
卷無序其一本一卷史官蔣偕作序然以序考之
則偕所序蓋七卷者也淳熙戊申四月十九日笠
澤陸某識

跋李莊簡公家書

李丈參政罷政歸鄉里時某年二十矣時時來訪
先君劇談終日每言秦氏必曰咸陽憤切慨慷形

於色辭一日平旦來其飯謂先君曰聞趙相過嶺
悲憂出涕僕不然謫命下青鞵布鞵行矣豈能作
兒女態邪方言此時目如炬聲如鐘其英偉剛毅
之氣使人興起後四十年偶讀公家書雖徙海表
氣不少衰叮嚀訓戒之語皆足垂範百世猶想見
其道青鞵布鞵時也淳熙戊申五月己未笠澤陸
某題

跋之采先生橐

肩吾文忠公四世孫博學工文章與予蓋莫逆也
晚來行在諸公貴人頗知之欲引置要津有毀之
者肩吾既不偶乃調桂陽令去客姑蘇未繫舟暴
疾一夕死哀哉嘉父捷爲人肩吾沒後數年始以
進士起家淳熙戊申秋社日放翁書

跋吳夢予詩編

山澤之氣爲雲降而爲雨勾者伸秀者實此雲之
見於用者也予嘗見早歲之雲乎嗟峨突兀起爲

奇峰足以悅人之目而不見於用此雲之不幸也
君子之學蓋將堯舜其君民若乃放逐顛頽娛悲
舒憂爲風爲騷亦文之不幸也吾友吳夢予橐其
歌詩數百篇於天下名卿賢大夫之主斯文盟者
翕然歎譽之末以示余余愀然曰子之文其工可
悲其不幸可弔年益老身益窮後世將曰是窮人
之工於歌詩者計吾吳君之情亦豈樂受此名哉
余請廣其志曰窮當益堅老當益壯丈夫蓋棺事

始定君子之學堯舜其君民余之所望於朋友也
娛悲舒憂爲風爲騷而已豈余之所望於朋友哉
淳熙十五年十一月二十六日甫里陸某書

跋松陵集三

淳熙十六年四月二十六日車駕幸景靈宮予以
禮部郎兼膳部檢察賜公卿食訖事作假會陵陽
韓籍寄此集來云東都舊本也欣然讀之時寓輒
街巷南小宅之南樓山陰陸某務觀手識

此集蔡景繁舊物復嘗歸韓子蒼子蒼之孫籍以遺予蓋百年前本也

景繁元豐中嘗爲開封推官此所題開封南司者是也景繁二子居厚居易此題居厚者其長也景繁臨川人而韓子蒼居臨川故得此書務觀手記

跋王仲言乞米詩

仲言貸米本自欲就魯肅輩人而良齋又戒以勿取陶胡奴米仲言治已可謂嚴而良齋告之亦可

謂忠矣數年來仲言以貧甚客長安中豪子資給殊厚今春忽捨去主人叩首乞少畱不可豈獨能踐初言亦不負良齋期待矣淳熙已酉四月二十七日陸某務觀書

跋金奩集

飛卿南鄉子八闕語意工妙殆可追配劉夢得竹枝信一時傑作也淳熙已酉立秋觀於國史院直廬是日風雨桐葉滿庭放翁書

跋韓非子

右韓非子一卷紹興丁卯先君年六十時傳吳棫才老本後四十有二年淳熙己酉某重裝而藏之時年六十有五十月九日史院東閣手識

跋却掃編

此書之作敦立猶少年故大抵無紹興以後事淳熙己酉十一月十四日書於儀曹直廬

跋彩選

紹興甲戌七月三日子宅過此彩選畢景丙子二月五日同季思訪務觀雲門山草堂復爲此戲子宅記

紹興十九年正月十有七日友人王仲言父自京江來以是書爲贈餘醮菴記

官制左右丞不爲平章事自侍郎拜者皆躡遷尚書此書蓋失之

子宅季思下世忽已數年予今年六十有七覽此

太息然予方從事金丹丹成長生不死直餘事耳
後五百年過雲門草堂故趾思管作彩戲豈非夢
邪紹熙元年上元日放翁書去子宅題字時三十
年矣

跋陝西印章

紹熙庚戌正月十九日夜閣故書得此追思在山
南時已二十年同幙惟周元吉閣才元章德茂張
季長及余五人尚亡恙爾拊卷累歎放翁題

又十有五年當嘉泰之四年歲在甲子因暴書再
觀則元吉才元德茂又皆物故數年矣季長在蜀
累歲不得書存亡有不可知者而予年已八十感
歎不能已八月十六日務觀書

跋詩藁

此予丙戌以前詩二十之一也及在嚴州再編又
去十之九然此殘藁終亦惜之乃以付子聿紹熙
改元立夏日書

跋祕閣續帖張長史率意帖

此一帖在故簽書樞密王倫家倫出使時得之故都予少日嘗見之紹熙改元五月甲子甫里陸某識時年六十有六距初見時四十有五年矣

跋王深甫先生書簡

深甫先生以治平二年七月二十八日卒而此卷末畱其弟容季書是年六月一日相距無兩月矣悲夫紹熙元年六月望陸某書

此書朝夕觀之使人若居嚴師畏友之間不敢萌一毫不善意

跋郭德誼墓誌銘

仲晦先生識郭公墓或恨其太簡然吾夫子銘季札曰於虜有吳延陵季子之墓財十字耳至今傳以為寶彼賣菜求益之論可付一歎紹熙二年正月二十三日陸某謹書

又

顏魯公麻姑壇記東坡先生經藏記皆有大字小
字兩本蓋用羊叔子峴山故事千載之後陵谷變
遷尚冀其一存爾德誼之名固自不朽然吾元晦
爲斯人計亦至矣豈希呂兄弟孝愛篤至有以發
之邪紹熙二年正月壬申笠澤陸某識

跋郭德誼書

予童子時嘗避兵東陽山中距今六十年予長德
誼三歲計其年可以相從而不及也觀此遺墨爲

之太息紹熙二年正月二十三日笠澤老漁陸某
謹書

放翁題跋卷之三

跋後山居士長短句

唐末詩益卑而樂府詞高古工妙庶幾漢魏陳無
已詩妙天下以其餘作辭宜其工矣顧乃不然殆
未易曉也紹熙二年正月二十四日雪中試朱元
亨筆因書

跋蘇氏易傳

此本先君宣和中入蜀時所得也方禁蘇氏學故

謂之毗陵先生云紹熙辛亥七月二十日陸某識

跋資暇集

吾家舊有此本先左丞所藏書字簡樸疑其來久矣首曰隴西李斤文濟翁編斤字猶成文也久已淪墜忽尤延之寄刻本來爲之愴然紹熙二年十一月二十九日陸某識

跋法帖

此本嘗見之清勁可愛及移之石乃爾失真拙工

誤人如此乾符元年十一月乃改元此云三月何邪蔡君謨用螭字穎字俱非是又何邪紹熙三載正月二十二日三山下漚亭書

又

魯公書殊不類紙乃煙熏周副之語尤俚俗羅紹威用羅氏世寶印犯唐諱益可疑跋語詩句亦鄙甚也君謨豈至是哉惟錢希白字奇古可喜然非題顏帖乃翦它軸附卷後耳

跋蘭亭樂毅論并趙歧王帖

某恭聞太宗皇帝天縱聖學跨軼百王萬幾之餘
尤畱神翰墨文昭武穆世受筆法有若歧簡獻王
得稿書之妙蓋其爲學上稽三代兩漢以象其高
古下專以晉右將軍王羲之爲法以極其變化所
藏魯公作文王尊彝伯禽祀文王之器紹聖間詔
取藏祕閣宣和博古圖亦列於他周器上又政和
中關中發地得竹簡皆東漢討羌書檄字作章草

好事者爭取而王獨多獲之則王之窮深造微豈
寒窶書生所及哉至蘭亭脩禊序樂毅論又王所
愛玩天下名本王之於書名尊一代固無足異今
周器漢札雖不可復見而脩禊序樂毅論如魯靈
光歸然獨存意有神物護持非適然也王遺墨藏
家廟者今雖僅存某嘗獲觀皆奇而超絕動心駭
目往時米芾於書少許可獨推王以爲能學古人
語在芾所著書畫史王之孫不流以從官長東諸

侯懼書家不能盡見是奇蹟迺誼良工併刻樂石
置會稽郡齋而屬某書其後惟王歷事累朝典司
宗盟嘉言善行不可勝載文章尤長於詩有唐人
餘風此特論其書而已紹熙四年正月辛卯中奉
大夫提舉建寧府武夷山冲佑觀山陰縣開國男
食邑三百戶陸某謹書

跋蔡肩吾所作蘧府君墓誌銘

蔡迨肩吾與予同官犍爲郡文辭字画皆過人自

蜀入吳持予書見友人許昌韓无咎无咎時爲吏
部侍郎薦之甚力且有除命矣蜀士有排之者肩
吾遂從銓部得桂陽令行至吳門暴死舟中每念
之未嘗不流涕也不識肩吾者讀此文亦足知其
不凡矣蘧昌老字真叟亦佳士益與肩吾爲方外
友云紹熙癸丑立夏日笠澤陸務觀書

跋原隸

故吏部郎宇文卷臣所著卷臣爲郎數月坐口語

方翁是跋 四
亟去晚守臨邛廣漢有能名然亦以謗絀遂卒於家可哀也紹熙癸丑四月二十一日老學菴書

跋京本家語

本朝藏書之家獨稱李邯鄲公宋常山公所蓄皆不減三萬卷而宋書校讐尤爲精詳不幸兩遭回祿之禍而方策掃地矣李氏書屬請康之變金人犯闕散亡皆盡收書之富獨稱浙江繼而胡騎南驚州縣悉遭焚劫異時藏書之家百不存一縱有

在者又皆零落不全予舊收此書得自京師中遭兵火之餘一日於故篋中偶尋得之而蟲齧鼠傷殆無全幅綴緝累日僅能成秩乃命工裁去四周所損者別以紙裝背之遂成全書嗚呼予老嬾目昏雖不復讀然嗜書之心固未衰也後世子孫知此書得存之如此則其餘諸書幸而存者爲予寶惜之紹興戊午十月七日雙清堂書

後五十有七年復脫壞不可挾子聿亟裝緝之持

以相示方先少係書此時某年十四今七十矣不覺老淚之濡睫也紹熙甲寅閏月四日第三男中大夫某謹識

跋李徂徠集

中野去魯歸周三詩可以追媿退之琴操而世不甚傳使予得見李公當百拜師之不特願爲執鞭而已紹熙甲寅六月二日書

跋劉文老使君義居遺戒

祥符中天子封禪講墜典以文太平詔求孝義之門於是天下以名聞者數十家遠不過十世獨吾鄉裘承詢自齊梁以來十九世如一日郡國莫先焉吾亡友劉文老歿當上一子世其祿而長子復辭以予其季蓋文老所未嘗命者於未嘗命者如此况其所命者乎將見世世守遺訓不墜十九世豈足道哉紹熙甲寅中秋日陸某識

跋無逸講義

按實錄元祐五年二月壬寅邇英閣講畢無逸篇
詔詳錄所講以進今後具講義次日別進壬寅是
月七日也與此卷首所云面奏乞候講畢錄進乃
不同恐當以此爲正紹熙五年八月十日陸某謹
識

跋東坡帖

此碑蓋所謂橫石小字者邪頃又嘗見豎石本字
亦不絕大數簡行筆尤奇竅可貴與成都西樓十

卷中所書郭熙山水詩頗相甲乙也紹熙甲寅十
月二十三日務觀題

跋東坡祭陳令舉文

東坡前後集祭文凡四十首惟祭賢良陳公辭指
最哀讀之使人感歎流涕其言天人予奪之際雖
若出憤激然士抱奇材絕識沉壓擯廢不得少出
一二則其肝心凝爲金石精氣去爲神明亦烏足
怪彼憤憤者固不知也紹熙甲寅十二月二十九

放翁是日笠澤陸某謹書

跋劉凝之陳令舉騎牛圖

公卿貴人方黃金絡馬傳呼火城中時欲如二公
騎牛山谷蕭散遺物固不可得若予者仕既齟齬
及斥歸欲買一黃犢代步其費二萬有畸作欄蓄
童又在此外遂一笑而止徒有此生猶著幾兩屐
之歎乃知二公風流亦未易追也紹熙甲寅十二
月二十九日陸某識

跋東坡七夕詞後

晉人作七夕詩率不免有珠櫳綺疏惜別之意惟
東坡此篇居然是星漢上語歌之曲終覺天風海
雨逼人學詩者當以是求之慶元元年元日笠澤
陸某書

跋張監丞雲莊詩集

虜覆神州七十年東南士大夫視長淮以北猶儻
荒也以使事往者不復黍離麥秀之悲殆無以慰

奮父老心今讀張公為奉使官屬時所賦歌詩數十篇忠義之氣鬱然為之悲慨彌日慶元改元九月二十七日陸某書

跋淵明集

吾年十三四時侍先少傅居城南小隱偶見藤床上有淵明詩因取讀之欣然會心日且算家人呼食讀詩方樂至夜卒不就食今思之如數日前事也慶元二年歲在乙卯九月二十九日山陰陸某

務觀書於三山龜堂時年七十有一

跋陸史君廟籤

晉者龐德公未曾入州府襄陽耆舊間處士節獨苦豈無濟時策終竟畏羅罟林茂鳥有歸水溪魚知聚舉家隱鹿門劉表焉得取

射洪陸史君廟以杜詩為籤極靈余自蜀被召東歸將行求得此籤後四十年乃決意不復仕宦媿吾宗人多矣紹熙辛亥十二月十日山陰陸務觀

書

跋巴東集

予自乾道庚寅入蜀至淳熙戊戌東歸九年間兩過巴東登秋風白雲二亭觀萊公手植檜未嘗不悵然流涕恨古人之不可作也又十有七年慶元丙辰六月二十四日山陰陸某書時年七十二

跋呂侍講歲時雜記

承平無事之日故都節物及中州風俗人人知之若不必記自喪亂來七十年遺老凋落無在者然後知此書之不可闕呂公論著實崇寧大觀間豈前輩達識固已知有後日邪然年運而往士大夫安於江左求新亭對泣者正未易得撫卷累欷慶元三年二月乙卯笠澤陸某書

跋許用晦丁卯集

許用晦居於丹陽之丁卯橋故其詩名丁卯集在大中以後亦可爲傑作自是而後唐之詩益衰矣

放翁是跋
十
悲夫慶元丁巳六月四日放翁識

跋李涪刊誤

王行瑜作亂宗正卿李涪盛陳其忠必悔過及行
瑜傳首京師涪亦放死嶺南疑卽此人也丁巳七
月十六日識

跋歸去來白蓮社圖

予在蜀得此二卷蓋名筆規模龍眠而有自得處
季子子聿手自裝褫藏之慶元丁巳中秋前三日

放翁識

跋釋氏通紀

予少時避兵東陽山中有沈師者丞相恭惠公之
裔近有僧來往天衣山自言歐陽文忠公家今又
得脩公所著釋氏通紀觀之則建炎樞臣盧公諸
孫也近世不以世類求人名門大家散而爲方外
道人者多矣如脩公旣棄衣冠猶能博學強記寓
史氏法於是書亦賢矣夫慶元丁巳重九日放翁

陸某務觀識

跋毛仲益所藏蘭亭

龍燦雲氣而上天鳳凰翔於千仞吾見舊定本蘭亭其猶龍鳳邪慶元丁巳十一月二十日笠澤陸某務觀書

跋魏先生草堂集

按國史野陝人沈存中筆談以爲蜀人居陝州不知何所據也予在蜀十年亦不聞野爲蜀人筆談

蓋誤也慶元戊午得之書肆十月十九日龜堂病叟手識時年七十有四矣

跋王輔嗣老子

晁以道謂王輔嗣老子題曰道德經不析乎道德而上下之猶近於古此本乃已析矣安知其他無妄加竄定者乎慶元戊午十月晦書

跋前漢通用古字韻編

古人讀書多故作文時偶用一二古字初不以爲

工亦自不知孰爲古孰爲今也近時乃或鈔綴史漢中字入文辭中自謂工妙不知有笑之者偶見此書爲之太息書以爲後生戒已未三月二十四日龜堂識

跋胡少汲小集

少汲之兄名僧孺字唐臣在元祐紹聖間亦知名士也少汲十詩中一篇所謂阿兄驚世才者是也周秀實名蔚予亡姑之子及與元祐前輩游紹興十六七年猶亡恙有文集數十卷王性之作序少汲倡酬最多班班見於此集秀實有子名曇文者乃翁每稱其穎異自先少師捐館兩家相去地遠不復相聞每爲之惻愴於懷也因讀少汲小集併書之慶元己未七月一日老學菴書

跋曉師顯應錄

法華之爲書天不足以喻其大海不足以喻其深利根之士一經目一歷耳自不能捨雖舉天下沮

之彼且不動尚何勸相之有哉然人之根性利鈍
蓋有如天淵者善知識諄諄告語誘之以福報懼
之以禍罰亦有不得已者譬之世法道德風化固
足坐致唐虞三代之治矣而賞以進善罰以懲惡
亦烏可廢哉觀曉師顯應錄者當作是觀慶元巳
未立秋日山陰陸某書

跋范巨山家訓

人莫不愛其子孫愛而不知教之猶弗愛也人莫

不思其父祖思而不知奉其教猶弗思也使爲人
父祖者皆如范氏之先爲人子孫者皆如吾友巨
山世其有不興者乎吾所謂興者天地鬼神與之
鄉人慕之學者尊之是爲興不然雖門列戟床堆
笏德弗稱焉何興之有巨山之子旣以文章擢高
科公卿將相之儲也故予思廣其意而書其家訓
後如此巨山父子不以予爲老悖則將有感也夫
巨山名中立其子名薰慶元巳未八月晦山陰陸

某謹書

跋張安國家問

東坡先生書遍天下而黃門公所藏至寡蓋常以爲易得雖爲人持去不甚惜也紫微張舍人書帖爲時所貴重錦囊玉軸無家無之今大宗伯兄弟目爲知己家書往來蓋以百計矣相稱相勉期以遠者亦何可勝計而今所存財五紙耳方紫微亡恙時豈亦以爲易得故多散逸邪某管者及爲紫

微客今老病臥家而大宗伯猶以世舊寄此卷命寓姓名於後某自浮玉別紫微三十六年之間摧頽抵此紫微若尚在而見之且不能識則大宗伯尚何取哉援筆至此慨然不知衰涕之集也慶元五年十一月戊申笠澤陸某書

跋坐忘論

此一篇劉虛谷刻石在廬山以予觀之司馬子微所著八篇今管賢達之所其傳後學豈容置疑於

其間此一篇雖曰簡略詳其義味安得與八篇爲比兼既謂出於子微乃復指八篇爲道士趙堅所著則堅乃子微以前人所著書淵奧如此道書仙傳豈無姓名此尤可驗其妄予故書其後以祛觀者之惑已未十一月二十一日放翁書

跋唐盧肇集

子發嘗謫春州而集中誤作青州蓋字之誤也題清遠峽觀音院詩作青州遠峽則又因州名而妄

竄定也前輩謂印本之害一誤之後遂無別本可證真知言哉病馬詩云塵土臥多毛已暗風霜受盡眼猶明足爲當時佳句此本乃以已爲色猶爲光壞盡一篇語意未必非妄校者之罪也可勝歎哉慶元庚申二月三日放翁燈下書

跋居家雜儀

王性之言熙寧初有朝士集於相藍之燒朱院俄有一人未至問之則王元澤也時荆公方有召命

衆人問舍人不堅辭否元澤言大人亦不敢不來然未有一居處衆言居處固不難得元澤曰不然大人之意乃欲與司馬十二丈卜鄰以其脩身齊家事事可爲子弟法也某聞此語六十年矣偶讀居家雜儀遂識之慶元庚申五月四日書

跋皇甫先生文集

右一詩在浯溪中興頌傍石間持正集中無詩詩見於世者此一篇耳然自是傑作近時有容齋隨

筆亦載此詩乃云風格殊無可采人之所見恐不應如此或是傳寫誤爾慶元六年五月十七日龜堂書

跋南堂語

予入蜀時南堂入滅已久獨有一二弟子在然皆破齋犯律諸禪皆詆訾之予亦以衆毀意薄其爲人及其歿也乃卓然穎脫人亦不得而議是誠未易測也庚申五月壬戌書於龜堂

跋注心賦

世之未通佛說者觀此亦得其梗槩矣慶元庚申七月庚申龜堂老人書

跋朱新仲舍人自作墓誌

秦丞相擅國十九年而朱公竄嶠南者十有四年僅免僵仆於災瘴中耳以此胸中浩然無愧將終自識其墓辭氣山立向使公諂附以苟富貴至莫年世事一變方憂愧內積惟恐聞人道其平日事

其能慨然奮筆自叙如此乎慶元六年秋社日陸某謹書

跋黃魯直書

老子曰豫兮若冬涉川猶兮若畏四鄰山谷此卷蓋有得於此慶元庚申重九日笠澤陸某書

放翁題跋卷之四

跋蘭亭序

觀蘭亭當如禪宗勘辨入門便了若待渠開口堪作什麼識者一開卷已見精麤或者推求點畫參以耳鑑瞞俗人則可但恐王內史不肯爾余平生見佳本亦多然如武子所藏不過三四真可寶也慶元庚申重九日笠澤陸某書

跋李少卿帖

宣城李氏自推官至今八九世詩人不絕蓋時有如少卿者振起之也慶元庚申九月二十日笠澤陸某書

跋樂毅論

樂毅論縱橫馳騁不似小字瘞鶴銘法度森嚴不似大字此後世作者所以不可仰望也庚申重九陸某書

跋李朝議帖

胡唐臣僧孺少汲直孺兄弟爲江西名士其朋友亦皆知名朝議公益其一也慶元庚申重九日陸某書

跋東方朔畫贊

元豐間有德州士人攜畫贊示東坡自言二百年前本家藏數世矣東坡爲題之曰畫贊世多本惟德州者第一君所藏又爲德州第一或曉之曰此言君是德州人耳其人雖不伏亦大笑止因觀武

子所藏聊識卷末慶元六年九月甲子陸某務觀書

跋李虞部與范忠宣公啓

某家藏先大父遺書其積背多當時士大夫牋啓刺字不過曰尚書左丞或曰左丞中大而已數十百人無一人異者此建中靖國之元也上距元祐又十餘年風俗淳厚可知況丞相忠宣公與虞部李公之相與親厚者乎空其不爲諂也諸公或以

今日耳目求之過矣夫慶元庚申九月二十一日陸某書

跋范文正公書

觀范文正公書札如欲與韓魏公同薦李泰伯見其進賢之誠戒余安道石守道避禍見其愛憎人材之意於虜賢哉然泰伯卒棄不用安道守道俱陷患難或至死不解志士仁人至今以爲歎信乎明詰保身之難也慶元庚申九月二十九日笠澤

放翁是跋
三六四
病叟陸某書

跋東坡帖

成都西樓下有汪聖錫所刻東坡帖三十卷其間與李給事陶一帖大略與此帖同是時時事已知矣公不以一身禍福易其憂國之心千載之下生氣凜然忠臣烈士所當取法也予謂武子當求善工堅石刻之與西樓之帖竝傳天下不當獨私囊褚使見者有恨也

跋盧衷父絕句

客懷耿耿自難寬老傍京塵更鮮歡遠夢已回
函不曉杏花同度五更寒

盧衷父絕句衷父名蹈青社人今寓犍爲郡夾江縣佳士也

跋四三叔父文集

先楚公捐館時叔父未成童已從章貢黃先生安時學器禮覆講無小差蓋天資精敏如此謹附書

於遺文之後以示後人

跋王右丞集

余年十七八時讀摩詰詩最熟後遂置之者幾六十年今年七十七永晝無事再取讀之如見舊師友恨間濶之久也嘉泰辛酉五月六日龜堂南窗書

跋歐陽文忠公疏草

慶曆之盛蓋庶幾漢文景矣而賢人君子猶如是之難文忠公之奏議非獨不明諸公之讒也身亦墮排陷中滁州之謫是已於虜悲夫嘉泰二年人日笠澤陸某書

跋盤澗圖

紹興己卯庚辰之間予爲福州決曹延平張仲欽爲閩縣大夫朝暮相從後四年予佐京口仲欽佐金陵數以檄往來於鍾阜浮玉間把酒道舊甚樂又二十年予使閩中仲欽間居延平數相聞方約

相過而予蒙恩召還遂有死生之異言之悵然仲
欽之子爲西和守寄此軸來求詩蓋有二十餘年
予年七十有七矣嘉泰改元歲辛酉五月十九日
陸某書時予納祿已三年居會稽山陰之三山

跋爲琰師書維摩經

鄉僧琰上座求予書維摩詰所說法欲刻石施四
衆以薦其母會予病不能卽如其請琰十返不厭
辱哉此僧吾徒所樂從也乃力疾爲書嘉泰壬戌

正月二十一日放翁書

跋東坡諫疏草

天下自有公論非愛憎與同能奪也如東坡之論
時事豈獨天下服其忠高其辯使荆公見之其有
不撫几太息者乎東坡自黃州歸見荆公於半山
劇談累日不厭至約卜鄰以老焉公論之不可揜
如此而紹聖諸人乃遂其伎心投之嶺海必死之
地何哉此疏藏馮氏三世八十年矣真可寶哉嘉

泰壬戌二月七日笠澤陸某謹書

跋東坡代張文定上疏草

張安道實一時偉人以其論新法諫用兵則不得不爲忠以其力排吳育澁惡石介歐陽文忠公司馬文正公斥之於前呂正獻公抑之於後則似有可議者然東坡此疏則自與日月爭光安道之爲人不與焉元祐初盡起舊老安道獨置不問近臣請加恩禮亦不報更奪其宣徽使議者以爲多出

正獻公之意云嘉泰壬戌二月七日笠澤陸某謹書

跋楊處士村居感興

一壺村酒膠牙酸十數胡皴徹骨乾隨著四婆
幫子後杖頭挑去賽蠶官

右畢仲荀景儒所記楊處士詩也四婆卽處士之配也蘇嶠季真家有處士夫妻像桼逸如生恨不曾傳摹得之它日見蘇氏子孫尚可畢此志也嘉

放翁是跋 七
泰癸亥放翁書於三山老學菴北窗

跋朱氏易傳

易道廣大非一人所能盡堅守一家之說未爲得也元晦尊程氏至矣然其爲說亦已大與讀者當自知之嘉泰壬戌四月十二日老學菴識

跋晁以道書傳

晁以道著書專意排先儒故其言多而不通然亦博矣凡予家所錄本多得於以道孫子闔子闔本

自多誤予方有吏役故所錄失誤又多不暇校定及謝事居山陰欲得別本參攷又不能致可恨也壬戌四月十八日老學菴記時年七十八

跋嵩山景迂集

景迂廊時排悶詩云莫言無妙麗土稚動金門蓋廊人善作土偶兒精巧雖都下莫能及宮禁及貴戚家爭以高價取之器亂隔絕南人不復知此句遂亦難解可歎嘉泰壬戌四月二十四日放翁識

跋任德翁藥桴集

德翁感遇篇云言行身不用無迺我所欲長沙地卑溼正可高閣足其議賈生可謂善矣所抱如此排擯至歿天下之不幸也壬戌五月一日老學菴書

跋洪慶善帖

某兒童時以先少師之命獲給掃洒丹陽先生之門退與子威講學則兄弟如也每見子威言洪成

季慶善學行然皆不及識今獲觀慶善遺墨亦足少慰衰病廢學負師友之訓如媿何嘉泰五年五月丁卯陸某謹記

跋蒲郎中易老解

易學自漢以後寢微自晉以後與老子並行其說愈高愈非易之舊宋興有酸棗先生以易名家同時种豹林亦開門傳授傳至邵康節遂大行於時然康節欲以授伊川程先生乃拒弗受而伊川每

稱胡安定王荆公易傳以爲今學者所宜讀惟此
二家王公乃自毀其說以爲不足傳著論悔之易
之難知如此夜讀蜀蒲公易傳老子解明然歎曰
公於易與老子蓋各自立說迹若與晉諸人同而
實異也書以遺其族孫申仲試以予言請問信何
如也嘉泰二年九月丁卯笠澤陸某書

跋陸子彊家書

吾友伯政持其先君子家問來讀之累日不厭使

學者皆能如此孰得而訾病之雖有訾者吾可以
無愧矣乃令子聿鈔一通置篋中時覽觀焉嘉泰
壬戌十月二十三日宗人某書

跋子聿所藏國史補

子聿喜蓄書至輟衣食不少吝也吾世其有興者
乎嘉泰壬戌閏月幾望放翁記時年七十有八以
同修國史兼祕書監居六官宅第六位

跋火井碑

予嘗在征西幙府嘗得小技言火山軍地枯燥不可耕鉏犁入地不及尺烈火隨出今江吳間穿地尺餘則見水北人聞之亦未必信也夜讀蜀彭君火井碑乃知天地間何所不有亦喜彭君之善記事也嘉泰壬戌閏月十有五山陰陸某務觀書

跋韓晉公牛

予居鏡湖北渚每見村童牧牛於風林煙草之間便覺身在圖畫自奉詔紬史逾年不復見此寢飯

皆無味今行且奏書矣奏後三日不力求去求不聽輒止者有如日嘉泰癸亥四月一日笠澤陸某務觀書

跋画橙

嘉泰癸亥四月十六日兩朝實錄將進書予以史官兼祕書監宿衛於道山堂之東直舍茶罷取此軸摩挲久之覺香透指爪此物著霜時予歸鏡湖小園久矣山陰陸某務觀書

跋臨帖

此書用筆靄靄多態度如雙鉤鍾王遺書可寶藏也笠澤陸務觀跋時年七十九當嘉泰癸亥四月二十八日居於六官宅老學行菴

跋米老画

画自是妙迹其爲元章無疑者但字卻是元暉所作觀者乃并画疑之可歎也嘉泰癸亥四月二十九日陸務觀書

跋潘函老帖

潘函老詩妙絕世恨不見其字今見此卷無復遺恨矣癸亥五月一日笠澤陸某書

跋薌林帖

先少師使淮南實與薌林向公爲代薌林作雍熙堂於解中堂之前有井泉甘寒宜茶洪駒父聞之寄詩云何如喚取陸鴻漸石鼎風爐來試茶詩與除代堂帖同日到薌林大以爲與手書報先少師

今尚在也伏觀公移文奏牘稿大節貫金石然諸公所書已可傳世贅書之亦屋下架屋耳而某家世所傳足補薌林逸事者則不可不書以遺後人嘉泰三年五月十日陸某謹書

跋陳魯公所草親征詔

紹興辛巳壬午之間某由書局西府掾親見丞相魯公經綸庶務鎮服中外有人所不可及者然猶不知此詔爲出於公也後四十有三年某行年且

八十偶幸未先犬馬獲見公手稿於虜公之謙厚不伐與露才揚已者相去何啻十萬哉追懷盛德大度如巨山喬嶽凜然猶在目前爲之霑涕嘉泰三年五月十二日門人前史官陸某謹書

跋蔡忠懷送將歸賦

予讀送將歸之賦爲之流涕不爲蔡氏也宋興百餘年累聖致治之美庶幾三代熙寧元祐所任大臣益有孟楊之學稷禹之忠而朋黨反因之以起

至不可復解一家之禍福曲直不足言也爲之子孫者能力學進德不爲偏諛則承家報國皆在其中矣嘉泰二年五月十五日山陰陸某書於浙江亭

跋東坡書髓

成都西樓下石刻東坡法帖十卷擇其尤奇逸者爲一編號東坡書髓三十年間未嘗釋手去歲在都下脫敗甚乃再裝緝之嘉泰三年歲在癸亥九月三日務觀老學菴北窗手記

跋范元卿舍人書陳公實長短句後

紹興庚申辛酉間予年十六七與公實遊時予從兄伯山仲高葉晦叔范元卿皆同場屋六人者蓋莫逆也公實謂予小陸兄後六十餘年五人皆已隔存歿予年七十九而公實郎君寔字伯廣者出此軸恍然如與公實元卿聯杖履均茵憑也爲之太息彌日因識其末雖然使歿而有知吾六人者

安知不復相從如紹興間乎會當相與挈手一笑
尚何歎嘉泰癸亥十月二十九日笠澤釣叟陸某
書

跋謝師厚書

謝師厚早歲與歐陽充公王荆公梅直講江記注
諸人遊名甚盛晚更蹭蹬居穰下二十餘年學愈
進文章愈成獨後諸公歿子情悰甥黃魯直皆知
名天下然年運而往士大夫鮮能知師厚者今觀

吾友傅漢孺所藏其上世墓刻實師厚遺文至送
行詩雜之宛陵詩中殆不可辨字則宋宣獻父子
之流亞也爲之太息嘉泰癸亥立春後四日笠澤
陸某書時年七十九

跋雲丘詩集後

宋興詩僧不愧唐人然皆因諸巨公以名天下林
和靖之於天台長吉宋文安之於凌雲惟則歐陽
文忠公之於孤山惠勤石曼卿之於東都祕演蘇

翰林之於西湖道潛徐師川在於廬山祖可蓋不可殫紀潛可得名最重然世亦以蘇徐兩公許之太過爲病餘則徒得所附託故聞後世非能歸然自傳也予觀雲丘詩平淡閒暇蓋庶幾可以自傳者政使不遇呂居仁蘇養直朱希真王性之范至能亦決不泯沒況如予者烏足爲斯人重哉其徒覺淨以遺稿來求題其後十款吾門不厭故爲之書嘉泰四年二月乙巳笠澤陸某書

跋呂舍人九經堂詩

前輩以文章名世者名愈高則求者愈衆故其間亦有徇人情而作者有識之士多以爲恨如呂公九經堂詩蓋自少時與昭德尊老諸公師友淵源講習漸漬所得又爲其子孫而發故雄筆大論如此於虜凜乎其可敬畏也哉嘉泰四年六月庚子陸某書

跋韓忠獻帖

方曩霄犯邊時忠獻王首當禦戎重任功冠諸公
後入輔帷幄陳謨畫策駕馭人材鎮服虜情自會
集賢以降皆協贊而已觀此帖可槩見也嘉泰四
祀六月辛丑故史官山陰陸某謹識

跋高大卿家書

子長大卿娶予表從母之女故自少時相從後又
同入征西大幕情分至厚讀此數書如見其長身
蒼髯意象軒舉也嘉泰甲子歲夏六月壬寅放翁

陸某書

放翁題跋卷之五

跋諸晁書帖

某之外大母清豐君實巨茨先生女兄而墓刻則景迂先生所作故某每見昭德及東眷中表每感愴也况今行年八十飾巾待盡伏讀此卷其情可知嘉泰甲子六月既望山陰陸某謹識

跋南城吳氏社倉書樓詩文後

南城吳君子直兄弟作社倉略倣古者斂散之法

於翁是跋
築書樓用爲子孫講習之地其設意深遠流俗殊未易測也或者乃爲吳氏捐貲以爲社倉凶歲免民於歿徙其有德於人甚大後世當有興者子孫不學則不足以承之此其築書樓之意使吳氏之意信出此乃市道也市道不可以交鄉黨自好之士其可以與天交乎吳君之意蓋曰吾爲是舉非一世也吾兄弟他日當要付之後人人不可知吝則嗇出貪則漁利息荒則廢事雖畱命之或不聽

於遺言何有惟學則免是三者之患而社倉雖百世可也此吾兄弟之本指若夫富貴貧賤我且不能自知乃爲後人謀而責報於荒忽不可致詰之地亦愚矣吳君遺書行千餘里示予以社倉本末因及諸公書樓紀述予慨然歎以爲知吳君兄弟心者算予若也故書之嘉泰四年六月某日山陰陸某書

跋六一居士集古錄跋尾

始予得此本刻畫精緻如見真筆會有使入蜀以寄張季長及再得之纔相距數年訛闕已多知古人欲傳遠者必託之金石有以也夫嘉泰甲子六月二十二日笠澤陸某謹識

跋林和靖詩集

和靖人物文章初不賴東坡公以爲重況黃秦哉若李端叔者尤不足錄讀竟使人浩歎書之所以慰和靖於泉下也嘉泰甲子六月二十四日放翁

識

跋米元暉書先左丞海岱樓詩

右米侍郎元暉書先大父題海岱樓詩一首春秋公羊傳曰山川有能潤於百里者天子秩而祭之觸石而出膚寸而合不崇朝而徧雨乎天下者惟泰山爾故大父云起爲霖雨從膚寸蓋言徧雨天下之澤自膚寸而始也米所書誤以從爲成遂失本意可爲太息嘉泰四年秋八月壬寅山陰陸某

書於三山老學菴

跋蘇丞相手澤

某之先大父左丞平生所尊事願學者惟丞相魏公每爲門生言國朝輔相德量歸然莫如魏公與王文貞公旦所謂築太平之基壽宗社之脉養天下之氣者他相雖賢莫敢望觀此奏稿可槩見也嘉泰四年秋八月丙辰山陰陸某謹識

跋韓幹馬

大駕南幸將八十年秦兵洮馬不復可見志士所共歎也觀此画使人作關輔河渭之夢殆欲賈涕矣嘉泰甲子十月二十一日山陰陸某書

跋義松

黃子邁之爲蓮城以最聞予以相距遠不能知其詳然草木無知造物無心太平無象其所感猶如此則是邑之民其有以不友不敬至庭造獄者乎予將求諸邑人而紀之未暇也嘉泰甲子歲十一

月甲子山陰陸某書

跋林和靖帖

祥符天禧間士之風節文學名天下者陝郊魏仲先錢塘林君復二人又皆工於詩方是時天子修封禪告太平有二人存天下麟鳳芝草不足言矣君復書法又自高勝絕人予每見之方病不藥而愈方飢不食而飽忽得觀上竺廣慧法師所藏二帖不覺起敬立法師能捐一石刻之山中使吾輩

皆得墨本以刮目散懷亦一奇事也嘉泰甲子歲十二月丁卯山陰陸某務觀書

跋東坡集

此本藏之三十年矣嘉泰甲子歲十二月遺燼幾焚之予緝成編比舊本差狹小乃可愛遂目之曰焦尾本云十四日山陰陸某書

跋陶靖節文集

張縝季長學士自遂寧寄此集來道中失調護前

後皆有壞處遂去之而存其偶全者未有年譜辨
正別緝爲編云開禧元年正月四日務觀書

跋三近齋餘錄

右外兄元城王正夫所作正夫名從元豐中書舍
人震字子發之子仕至上饒守云開禧改元正月
庚申務觀識

跋望江翹君集

徐常侍鼎臣送望江張明府詩云無使千年後空

傳翹令名則翹令之名在唐著矣開禧改元歲乙

丑二月二十七日山陰陸務觀書時年八十有一

跋吳越備使

錢氏諱佐故以左爲上凡官名左字者悉改爲上
此書所謂上右者乃左右也

又

吳越在五代及宋興最爲安樂少事然廢立誅殺
猶如此方斯時吾家先世守農桑之業於魯墟梅

市之間無一人仕於其國者真係家之法也開禧
乙丑九月四日山陰陸某書於三山書巢

跋僧帖

方外之士發揚其先德累世不懈吾輩亦可少愧
矣開禧乙丑九月五日陸某書贈觀師余年八十
一識其家四世矣安得不爲陳人乎因以寓歎

跋卿師帖

本朝小楷至宋宣獻後僅有道士陳碧虛一人今

見吾里中前輩卿師所書則蕭散小不逮碧虛而
法度森嚴無媿者亦名筆也後人善藏之開禧元
年乙丑歲九月丁亥山陰陸某務觀題時年八十
有一

跋松陵倡和集

皮襲美當唐末遜於吳越歿焉有子光業爲吳越
相子孫業文不墜家聲至襲美四世孫公弼以進
士起家仕慶曆嘉祐間爲韓魏公所知雖不甚貴

顯亦當世名士也方吳越時中原隔絕乃有妄人
造謗以爲襲美墮節於巢賊爲其翰林學士新唐
書喜取小說亦載之豈有是哉比唐書成時公彌
已歿莫與辨者可歎也開禧元年九月十四日山
陰陸某務觀書於松陵倡和集之後

跋潛虛

學者必通易乃能以其緒餘通玄玄旣通矣又以
其餘及虛非可以一旦驟得也劉君談虛如此則
其於易與玄可知矣司馬丞相乃謂已學不足知
易故先致力於玄蓋謙云耳開禧乙丑十一月十
八日笠澤陸某書

跋呂成未和東坡尖义韻雪詩

古詩有倡有和有雜擬追和之類而無和韻者唐
始有之而不盡同有用韻者謂同用此韻耳後乃
有依韻者謂如首倡之韻然不以次也最後始有
次韻則一皆如其韻之次自元白至皮陸此體乃

成天下靡然從之今蘇文忠集中有雪詩用尖义
二字王文公集中又有次蘇韻詩議者謂非二公
莫能爲也通判澧州呂文之成未乃頓和百篇字
字工妙無牽強湊泊之病成未詩成後四十餘年
其子棫乃以示予予固好詩者然讀書有限用力
尠薄觀此集有愧而已乃書集後而歸其本呂氏
開禧元年乙丑十一月丙申笠澤陸某務觀書

跋花間集

花間集皆唐末五代時人作方斯時天下岌岌生
民救死不暇士大夫乃流宕如此可歎也哉或者
亦出於無聊故邪笠澤翁書

又

唐自大中後詩家日趨淺薄其間傑出者亦不復
有前輩閎妙渾厚之作久而自厭然枯於俗尚不
能拔出會有倚聲作詞者本欲酒間易曉頗擺落
故態適與六朝跌宕意氣差近此集所載是也故

歷唐季五代詩愈卑而倚聲者輒簡古可愛蓋天寶以後詩人常恨文不迨大中以後詩衰而倚聲作使諸人以其所長格力施於所短則後世孰得而議筆墨馳騁則一能此不能彼未易以理推也開禧元年十二月乙卯務觀東籬書

跋韓晉公子母犢

予平生見三尤物王公明家韓幹散馬吳子副家薛稷小鶴及此子母牛是也不知未死間尚復眼

中有此奇偉否開禧二年四月甲子陸務觀老學菴北函書

跋韓立道所藏蘭亭序

觀此本蘭亭如見大勲業鉅公於未央庭中大冠若箕長劔挂頤風采凜凜雖單于不覺自失況餘子有不汗洽股栗者哉開禧丙寅歲四月十有三日陸某年八十二

跋龔氏金花帖子

右龔氏家藏其先世金花帖子嘉泰中陳翰林考
質史謀以爲先書姓名散報始於端拱中宋太素
尚書知貢舉時自建隆至端拱取士已久始克舉
此故事然予按宋公有追念策名時詩凡千言略
云吉音來碧落帖子報紅牋清夜驚神王曩明到
省前風中宮漏盡日出榜繩懸宋公益建隆二年
進士則國初已有前一夕報帖之事唐制初未嘗
廢若曰五代草創止用紅牋至端拱初乃加金華

如唐時則亦細事耳不得云始舉唐故事也世必
有知者予復書此於後以待博洽君子云開禧丙
寅夏四月丙寅山陰陸某書

跋曾文清公奏議稿

紹興末賊亮入塞時茶山先生居會稽禹跡精舍
某自敕局罷歸略無三日不進見見必聞憂國之
言先生時年過七十聚族百口未嘗以爲憂憂國
而已後四十七年先生曾孫黯以當日疏稿示某

於今某年過八十仕忝近列又方王師討殘虜時
乃不能以塵露求補山海真先生之罪人也開禧
二年歲在丙寅五月乙巳門生山陰陸某謹書

跋曾文清公詩稿

河南文清公早以學術文章擅大名爲一世龍門
顧未嘗輕許可某獨辱知無與比者士之相知古
蓋如此方西漢時專門名家之師衆至千餘人然
能自見於後世者寡矣揚子惟一侯芭至今誦之

故識者謂千人不爲多一人不爲少某何足與乎
此讀公遺稿不知衰涕之集也開禧丙寅歲五月
乙巳門生笠澤陸某謹識

跋魚計賦

某恭聞徽祖宣和末將下罪已詔學士王孝迪當
直不召顧謂輔臣曰非小字不能作遂召肅愍公
公初不在北門旣至辭以非職守不許遂授以聖
意下筆寥寥不數刻進御今載在國史與三代訓

誥竝驅蓋千百年間詔令所未有也晚讀魚計堂賦瞻麗超軼如此則施之大手筆固空絕人遠甚某嘗見公遺像於友人趙恬家英氣如生恨不得獨拜牀下致欣慕之意今得記所聞於賦後亦幸矣開禧二年六月己巳笠澤老民陸某謹書

跋徐待制詩稿

予以乾道庚寅入蜀幾十年而歸故人在朝者惟許昌韓无咎握手道舊因相與論當世知名士无

咎獨稱待制徐公以爲文辭辨論有貞元元和間諸賢之遺風恨予不及識因誦其詩句信奇作也後三十年徐公之子植以遺稿一編示予屬以序引予與待制雖出處不同時然嘗歎愛其筆墨則亦願託名卷首而待制之文阨於火所餘財百之二則序亦無自作乃姑書此附於後它日得全書紬繹其妙處而論載之尚未晚也開禧二年六月某日山陰陸某書

跋周益公詩卷

紹興辛巳予與益公相從於錢塘去題此詩時十一年予年三十七益公少予一歲後二年相繼去國自是用捨分矣今益公捨我去所不知者相距幾何時耳開禧丙寅九月二十五日山陰陸某謹識

跋樊川集

唐人詩文近多刻本亦多經校讐惟牧之集誤繆

特甚予每欲求諸本訂正而未暇也書以示子適尚成吾意開禧丙寅十一月二十七日放翁書

跋周侍郎奏稿

某生於宣和末未能言而先少師以畿右轉輸饟軍畱澤潞家寓滎陽及先君坐御史徐秉哲論罷南來壽春復自淮徂江間關兵間歸山陰舊廬則某少長矣一時賢公卿與先君遊者每言及高廟盜環之寇乾陵斧柏之憂未嘗不相與流涕哀慟

雖設食率不下咽引去先君歸亦不復食也伏讀
侍郎周公論事牘子猶想見當時忠臣烈士憂憤
感激之餘風於虜建炎紹興間國勢危蹙如此而
內平羣盜外捍強虜卒能披草莽立社稷者諸賢
之力爲多某故具載之以勵士大夫儻人人知所
勉則北平燕趙西復關輔實度內事也開禧丁卯
歲正月丁亥故史官陸某謹書

跋周侍郎尋姊妹帖

方建炎多故羣盜如林士大夫家罹禍有盡室不
知在亡者觀周公所書可爲流涕六七十年来在
仕在野皆安其生養老者字幼者藏死者可不知
所自邪尚勉思所以報開禧三年正月丁亥山陰
陸某書

跋鮑參軍文集

鮑明遠宋元嘉中人比陶淵明謝靈運差爲晚出
然與靈運詩名相埒體製亦頗相類故世稱鮑謝

云開禧三正九放翁書

跋南華真經

南華真經并音二冊籤題皆友人莆陽方伯謨書
伯謨下世已二年矣哀哉開禧丁卯二月四日老
學菴識

跋與周監丞書

某頃得監丞公書作報如此後二十餘年公家持
以來屬以題數字於後乃為記歲月公諸子多賢

不幸有早世者今惟主簿君以力學承其緒他日
仕途有嶄然頭角者必吾主簿君恨耄期已迫不
及見耳開禧三年三月丙子渭南伯陸某書於山
陰澤中老學菴

再跋皇甫先生文集後

司空表聖論詩有曰愚嘗覽韓吏部詩其驅駕氣
勢掀雷決電撐挾於天地之垠物狀其變不得鼓
舞而徇其呼吸也其次皇甫祠部文集外所作亦

放翁是跋 十六
爲適逸非無意於澁密蓋或未遑爾據此則持正自有詩集孤行故文集中無詩非不作也正如張文昌集無一篇文李習之集無一篇詩皆是詩文各爲集耳表聖直以持正詩配退之可謂知之然猶云未遑澁密非篤論也予讀之蓋累歎云開禧丁卯四月二十一日某再書

跋漢文帝後元年三月詔

漢文此詔與詩之七月書之無逸何異吾以此知

文景太平之有自也雖然豈獨爲天下哉十室之邑十金之產儻能思是言其有至於器敗者乎庚申五月十七日陸某書

跋張魏公與劉察院帖

與人同功人用而已捨君子不敢言勞與人同舉人免而已窮君子不敢逃責非能與夫人也理固如是也不然則亡耻已使御史公無恙得予此說其將以爲能知言乎

跋世父大夫詩稿

世父大夫公自幼得未疾以左手作字性喜鈔書
嘗鈔王岐公華陽集百卷筆筆無倦意豈特其書
可貴重哉亦可見其爲人矣

放翁題跋卷之六

跋魯直書大戴踐阼篇

上古之文幸不泯者率非後世所可及不必壞魯
壁發汲冢而得之乃可信也丹書之辭如此武王
之銘如此雖微大戴禮載之可置疑哉某鄉先生
傅公子駿爲學者言洪範自無偏無黨至歸其有
極三十二字皆古所傳爲人君之常訓箕子申以
告武王吳棫才老著尚書禕傳以爲得此說於虞

仲琳少崔少崔學於傅公此三十二字與丹書三十九字一傳於箕子一傳於師尚父武王敬受力行之卜世卜年之永有所自矣開禧三年五月辛卯故史官陸某識於黃太史所書踐阼篇後以遺廬陵彭君孝求

跋唐昭宗賜錢武肅王鐵券文

某按唐昭宗乾寧四年遣中使焦楚錕賜吳越武肅王鐵券以八月壬子至國是歲武肅始兼領鎮

東節出師大敗淮南兵十八營定發睦蘇湖州而鐵券適至蓋其國始盛時也及忠懿王入朝以其先王所藏玉冊鐵券置之祖廟不敢以自隨淳化元年杭州悉上之於朝時忠懿王已薨太宗皇帝復以冊券賜王之子安僖王惟濬安僖王薨券歸文僖公惟演文僖公薨券傳仲子霸州防禦使晦霸州侍仁宗皇帝燕閒帝問先世所賜鐵券欲見之霸州并三朝御書以進帝爲親識御書之末復

賜焉文僖之孫開府公景臻尚秦魯國大長公主
某年十二三時嘗侍先夫人得謁見大主鐵券實
藏臥內狀如笏瓦今七十餘年乃得見錄本於武
肅諸孫慙家後十字蓋文僖手書某家舊藏文僖
書帖亦有押字皆與此同武勝軍節度使印則文
僖尹洛時所領鄧州節鉞也開禧三年六月乙巳
山陰陸某謹書

跋司馬端衡畫傳燈圖

司馬六十五丈抱負才氣絕人遠甚方少壯時以
黨家不獲施用於時欲有以寓其胸中浩浩者遂
放意於画落筆高妙有顧陸遺風某嘗以通家之
舊親聞其論画衮衮終日如孫吳談兵臨濟趙州
說禪何其妙也每恨是時不能記錄一二以遺後
之好事者今獲觀傳燈圖恍如接言論風指時稽
首太息不能自已開禧丁卯歲十月丁未山陰陸
某謹題

跋呂伯英書後

紹興中某從曾文清公遊公方館甥呂治先日相與講學治先有子未成童卓然穎異蓋吾伯英也後數年伯英有盛名從之學者以百數不幸中道奄忽而予幾九十尚未死攬其遺墨大抵忠信篤敬之言也爲之涕下開禧丁卯歲十二月乙巳山陰陸某書

跋張敬夫書後

隆興甲申某佐郡京口張忠獻公以右丞相督軍過焉先君會稽公嘗識忠獻於掾南鄭時事載高皇帝實錄以故某辱忠獻顧遇甚厚是時敬父從行而陳應求參贊軍事馮園仲查元章館於予廨中蓋無日不相從迨今讀敬父遺墨追記在京口相與論議時真隔世事也開禧丁卯十二月乙巳山陰陸某書

跋劉戒之東歸詩

乾道中予與戒之同在宣撫使幙中同舍十四五
人宣撫使召還予輩皆散去范西叔宇文叔介最
先下世其餘相繼凋落至開禧中獨予與張季長
猶存今春季長復考終於江原予年開九秩獨幸
未書鬼錄偶得戒之郎君市征君所藏送行詩觀
之恍然如隔世事也爲之流涕丁卯十二月乙丑
渭南伯陸某書於山陰老學菴

跋秦淮海書

草秦淮海皆學顏平原真行豫章晚尤自稱
許淮海則退避不肯以書自名亦各行其志也嘉
定改元四月巳酉山陰陸某書

跋柳書蘇夫人墓誌

近世注杜詩者數十家無一字一義可取蓋欲注
杜詩須去少陵地位不大遠乃可下語不然則勿
注可也今諸家徒欲以口耳之學揣摩得之可乎
書家以鍾王爲宗亦須升鍾王之堂乃可置論耳

爾來書法中絕求柳誠懸輩尚不可得書其可遽論哉然予爲此言非獨觸人亦不善自爲地矣覽者當粲然一笑也嘉定元年四月巳酉陸某書

跋朱希真所書雜鈔

朱先生與諸賢當建炎間裔夷南牧羣盜四起時猶相與講學如此吾輩生平世安居鄉里乃欲飽而嬉可乎嘉定之元四月乙酉陸某書於山陰老學菴時年八十有四

跋爲子適書詩卷後

子適持尺紙求錄詩期季矣以乃翁衰疾不甚迫感予更以此念之爲寫終此卷然此兒近者時時出所作皆大進論建安黃初以來至元和後詩人皆有本末歷歷可聽吾每爲汗出因併記之嘉定戊辰歲五月乙巳放翁書時年八十有四

跋呂文靖門銘

一言可以終身行之者其恕乎此聖門一字銘也

詩三百一言以蔽之曰思無邪此聖門三字銘也其簡且盡如此學者苟能充之雖入聖域不難矣丞相申國文靖呂公作門銘自忠孝十有八字廣吾夫子之訓以遺後人某得本於公元孫祖平敢再拜書其後致願學之意嘉定元年夏五月辛亥山陰陸某謹識

跋傅給事竹友詩稿

王逸少寫經換鵞給事傅公籠鵝換竹二者皆山

陰勝絕事然換鵞事人皆能道之換竹事未甚著鄉人以爲恨獨某曰是不足怪也逸少志在物外不肯輕爲世用故換鵞事易傅給事方南渡之初忠義大節爲一時稱首雖困於讒誣用之不盡然至今聞其風者可立衰懦則換竹事固應不傳蓋所見於世者大也給事遺文百卷今藏祕閣某領策府時見之嘉定元年七月庚申陸某謹識

跋陳伯予所藏樂毅論

世傳中山古本蘭亭之流帶右天五字有殘闕處
於是士大夫所藏蘭亭悉然又謂樂毅論古本至
一海字止於是凡樂毅論亦至海字而亡其餘妄
偽亂真大抵如此今伯子此軸皆佳後一本尤敷
腴可愛未可以海字爲定論也嘉定戊辰歲七月
己未山陰陸某務觀書時年八十有四

跋伯子所藏黃州兄帖

某之從父兄故黃州使君遺墨伯子書其後發物

大旨至矣伏讀感涕不知所云先兄諱沈字子甫
仕至朝奉大夫嘉定元年七月己未山陰老民陸
某謹書

跋詹仲信所藏詩稿

予平生作詩至多有初自以爲可他日取視義味
殊短亦有初不滿意熟觀乃稍有可喜處要是去
古人遠爾詹仲信何處得予斷稿以見示爲之屢
歎乃題其後歸之嘉定改元六月壬辰山陰陸某

務觀書於三山老學菴年八十四

跋陳伯予所藏蘭亭帖

予監定此本自是絕佳然亦不必云唐舊刻也卷末數跋皆吾友王君玉所錄黃太史魯直語竊恐未必然蓋周孔無過蘭亭筆法亦無過學者步亦步趨亦趨猶或失之豈可以輕心慢心觀之哉若以夫子嘗自謂有過孟子云周公之過遂據以爲周孔有過乃醉夢中語也嘉定改元十月庚午陸

某書

跋坡谷帖

先大父左轄元祐中自小宗伯自請守穎逾年移南陽而蘇公自北扉得穎與大父爲代此當時往來書也書三幅前後二幅藏叔父房其一幅則從伯父彥遠得之亡兄次川又得於伯父此是也傳授明白可以不疑而或者疑其出於摹倣識真者寡前輩所歎嘉定元年十二月乙亥山陰陸某謹

識

跋山谷書陰真君詩

此石刻在夔州漕司白雲樓下黃書無出其右者
嘉定己巳四月辛卯放翁書

跋呂尚書帖

右尚書呂公給事傳公往來書二卷書曰管先正
保衡作我先王語曰起予者商也蓋臣當有以作
其君弟子當有以起其師而況朋友之際乎二公

可謂無負於古道矣使此書廣傳安知百世之下
無興起者嘉定己巳秋七月辛亥山陰陸某識

跋傅給事帖

紹興初某甫成童親見當時士大夫相與言及國
事或裂背嚼齒或流涕痛哭人人自期以殺身翊
戴王室雖醜裔方張視之蔑如也卒能使虜消沮
退縮自遣行人請盟會秦丞相檜用事掠以爲功
變恢復爲和戎非復諸公初意矣志士仁人抱憤

入地者可勝數哉今觀傅給事與呂尚書遺帖死者可作吾誰與歸嘉定二年七月癸丑陸某謹識

跋熊舍人四六後

裕陵見伯通外制手批付中書曰熊本文詞朕自知之荆公亦曰讀熊君奏報如面相語

跋臨汝志

歐陽澈字德明撫州臨川人徙崇仁金虜犯闕上書請身使虜庭馭親王以歸不報建炎初伏闕上

書論大臣誤國太學生陳東亦上書所言略同遂併誅二人年三十一車駕渡江贈承事郎紹興初贈朝奉郎祕閣修撰官其三子賜田十頃

跋尼光語錄

予登豫章西山其上蓋有光禪師塿焉及來成都又得師所說法要博辯奇偉雷霆一世猶有蜀忠文公立朝堂堂不撓於死生禍福之遺風信其爲范氏女子也笠澤漁隱陸某

跋程正伯所藏山谷帖

此卷不應攜在長安逆旅中亦非貴人席帽金絡馬傳呼入省時所觀程子他日幅巾筇杖渡青衣江相羊喚漁潭瑞草橋清泉翠樾之間與山中人共小巢龍鶴菜飯掃石置風爐煮蒙頂紫苗然後出此卷共讀乃稱爾

跋張待制家傳

待制公躋於仕宦晚途僅得一郎吏而感激國難

冒兵渡河北行忠義之氣可沮金石方其客死靈丘寓骨雲中時雖夷狄異類亦爲霽涕也今其家寢微一孫未去天官侍郎選公卿大夫乃未有表出之以爲忠義勸者誠某所不識也

跋柳氏訓序

方批之爲是書也璨已長矣詩曰誨爾諄諄聽我藐藐悲夫

跋祠部集

祠部叔祖詩文至多今皆不傳此小集得之書肆
蓋石氏所藏也某謹識

跋消災頌

高道傳言此頌蓋武陵張尊師作尊師亦號白雲
子豈以此故遂誤為子微乎玉笈齋書

跋肇論

高僧傳肇公化時年三十一耳所著書乃傳百世
吾曹老而無聞可愧也

先楚公奏檢

舊有海陵時錄白元本巨編大字有先左丞親書
更定處今不復存此本紹興中先少師命筆史傳
錄者某識

跋宗元先生文集

宗元先生吳貞節唐史有傳以歌詩名天寶中此
一卷蓋見雲章寶室云放翁書

跋韓子蒼語錄

此故人范季隨周士所記也周士沒後數年得之於其子然予舊聞周士道韓公語極多尚恐所記不止於此當更訪之

跋孟浩然詩集

此集有示孟郊詩浩然開元天寶間人無與郊相從之理豈其人偶與東野同姓名邪晁伯以謂岳陽樓止有前四句亦似有理

續考之伯以之說蓋不然大抵浩然四十字詩後四句率覺氣索如洞庭寄閩九歲算歸南山之類皆然杜少陵評浩然詩云新詩句句盡堪傳豈當時已有此論故少陵爲揜之邪

適越畱別譙縣張主簿詩初云得與故人會後云浮雲去吳會此亦是吳與會稽也

跋出疆行程

此一書蓋陳魯公出使時官屬所記不知爲何人也文詞雖鄙淺事頗詳洽故錄之

淳熙已酉秋錢愷之子端忠爲金部外郎予在儀曹與之同廊日會食嘗問此書誰所作端忠云刁靡也靡字文叔頗有文不應鄙淺如此恐未必然也放翁書

跋李衛公集

韋執誼之爲人順宗實錄及唐書載之甚詳正人所唾罵也今觀李衛公祭文稱譽之乃如此衛公之言固過矣史官所書無乃亦有溢惡者乎毀譽之可疑如此者多矣可勝歎哉執誼作相時實錄言嘗遷中書侍郎同平章事而史不書衛公又以爲僕射雖小節亦聊附見於此

跋徐節孝語

仲車名在天下孰不知尊仰者雖無蘇公所云可也況它人乎此集前後所載悉當削去陸某識

跋趙渭南詩集

唐人如韋蘇州五字趙渭南唐律終身所作多出

此故能名一代云

跋石鼓文辨

予紹興庚辰辛巳間在朝路識鄭漁仲好古博識誠佳士也然朝論多排詆之時許至三館借書故館中尤不樂云

跋西崑酬唱集

祥符中嘗下詔禁文體浮豔議者謂是時館中作宣曲詩宣曲見東方朔傳其詩盛傳都下而劉楊臨邛遠之句賴天子愛才士皆置而不問獨下詔諷切而已不然亦殆哉

跋兼山家學

予始得此書時猶未識昌國後五年始同朝詳觀其爲人誠法度之士間相與論學輒忘昏且乃知其得於子和先生者深矣昌國名其所居曰良齋亦以嗣兼山之學歟

跋淮海後集

悼王子開五詩賀鑄方回作也子開名遠居江陰既死返葬趙州臨城故有和氏干將之句方回詩今不多見於世聊記之以示後人放翁

跋張季長中庸辨擇

此書大槩似陳瑩中初著尊堯集識者當自得之

跋法書後

法書一編付子適能熟觀之亦可得筆法之梗槩

矣

跋李太白詩

此本頗精今當塗本雖字大可喜然極謬誤不可不知也

跋重廣字說

字說凡有數本蓋先後之異此猶非定本也

跋巖壑小集

朱希真夜熱坐寺庭五字一篇及病虎過酒樓二

古詩皆出同時諸人上

跋王元澤論語孟子解

元澤之歿詔求遺書荆公視篋中得論語孟子解
皆細字書於策之四旁遂以上之然非成書也

余於渭南縣伯諸書已七跋矣又復何言但

其詠叙頭鳳一事孝義無摯更有一種啼笑

不敢之情溢於筆墨之外故併記之按放翁

初娶唐氏閔之女也伉儷相得弗得手姑出

之未忍絕為別館往焉姑知而掩之遂絕後
改適同郡宗子士程嘗於春日出遊相遇禹

蹟寺南之沈氏園放翁悵然賦一調云紅酴

手黃藤酒滿城春色宮牆柳東風惡歡情薄

一懷愁緒幾年離索錯錯錯春如舊人空

瘦淚痕紅浥鮫綃透拋花落開池閣山盟雖

在錦書難托莫莫莫令人不能讀竟海隅毛

晉識

晉識



